

Aur la neva seziun didatica: "L Segat"

En sabeda ai 13 de mé vegn enaudà ló da la Sia de Meida la seziun del Museo Ladin de Fascia, endrezèda en colaborazion con la Frazion de Poza e la Scola Ladina de Fascia

Cultura - Prest vegnirà ofizialmenter orida al publich la neva seziun del Museo Ladin, durèda soraldut per fins didatics (ma no demò) e nasciuda tel chèder del projet de renovament de la veia Sia de la Frazion de Poza fata fora da pech, de gra a la colaborazion anter l'Istitut Cultural ladin, la Scola de Fascia e l'Asuc de Poza, patrona del fabricat.

La seziun fesc pèrt del sistem articulà de strutures de enteress etnografich recuperèdes ti ùltime 30 egn da l'Istitut Cultural ladin ti desvalives paijes de la val, col zil de meter al luster l fort leam che l'é anter i "segnes" del passà e la realtà d'aldidanché, e sporjer estrapede na descrizion menuda de la dinamiches de mudament che à caraterisà e caraterisea la storia e l prejent de la comunanza ladina.

L'alestiment elegant, dedicà dantaldut al confront anter la sies tradizionèles a èga e la tecniches modernes per lurèr l legnam, dèsc ence l met de cognoscer più a fon duc i setores produtives leé al lurier tel bosch.

A peèr via da la emportanza del desfrutament del bosch per la comunanza de Fascia ti sécoi, se podarà cognoscer i desvalives èlbres del post e cognoscer trei lurieres leé al legnam: l boschier, l segat e l marangon. Vigniun de chisc setores l'é portà dant tras tesé, retrac storics, filmac e ogec etnografics touc sù ti egn da l'Istitut Cultural Ladin, e, anter chisc, se tol fora la gran colezion "Bepo e Jan Cherlo" da Moena. Chesta famea, marangons da generazions, l'à binà sù e conservà con gran pascion èrc, projec, studies e codejje, e la i à metui a la leta per l'alestiment.

L'é stat de gran emportanza ence la colaborazion co la Scola de Fascia, che l'à lurà fora e metù a jir n projet didatich de doi egn dal titol

"Dò l troi del legn / Sulla via del legno", olache la doi istituzions à podù lurèr ensema te desvalives ciampes, a peèr via da n percors formatif out ai studenc e dozenc che se à dat jù te la enrescida, la projetazion e la realisazion de percors didatics de la seziun museala, per ruèr tinultima a la fasa più tecnica e operativa. Chesta neva seziun, realisèda de gra al sostegn finanzièl de la Provinzia de Trent (Servizio Attività culturali e Servizio Foreste e Fauna), de la Region Autonoma Trentin-Südtirol (Ripartizione Minoranze Linguistiche) e ence del Comun de Poza, la vegnarà inaugurèda ai 13 de mé da les 3 domesdi ló da la Sia de la Frazion de Poza, sa Meida, e la smaorarà l'oferta del Museo Ladin de Fascia sul teritorie, apede la Sia de Penia, l Molin de Pera e la seziun dedichèda al lurier del Malghier ló da la Mèlga de Pera.



Na pèrt de l'esposizion di èrc da marangon, metul a la leta da la famea de Bepo e Jan Cherlo.